

Zastava BiH na krovu Irana planini Damavand



Prije osam dana četvero bh. planinara krenulo je zajedno sa još osam kolega iz Crne Gore, Hrvatske, Mađarske i Srbije na "Ekspediciju Damavand 2019", u pokušaju da pristupe na krov Irana i planinu Damavand na 5.610 metara nadmorske visine.

Naš tim su predstavljali Senada Smajilagić, Zijad Zimić, Amir Junuzović i Senad Bečković, a ekspediciju su vodili iskusni vodič Aleksandar Rašin, koji je 17 puta bio u masivu Himalaja, i Biljana Mjedenica.

"Na završni uspon smo krenuli u tri sata ujutro, bilo je -5 stepeni, a uz vjetar je to bilo mnogo više pa je bilo malo i smrzavanja. Međutim, ni tad nismo gubili smisao za humor. Oko 5:35 sati dočekali smo poseban trenutak, izlazak sunca i svitanje, a ti prizori vas jednostavno ostave bez daha. Sjena planine u daljini je nevjerovatan fenomen te takvi prizori, nas 'osvajanje beskorisnog' motiviraju i guraju dalje iako ste već podobro iscrpljeni", rekao je Bečković.

Na vrh su pristupili u 11:15 sati i ponosno zavijorili zastavu BiH, što je i ovoga puta bio posebno emotivan trenutak.

"Damavand je uspavani vulkan sa jakim sumpornim isparavanjem iznad 5.000 metara te se iznad te visine zaista teško penjati bez maske. Ali i pored toga uspjeli smo pristupiti na vrh. Nažalost, do kraja sa nama nije bila Senada jer je na oko 5.100 metara imala veliki problem sa obućom te se, bez obzira što se dobro osjećala, morala vratiti u bazni kamp", naveo je Zimić.

Damavand je planina na sjeveru Irana, izdvojena od svih masiva, markantna i dominantna te tako često izložena klimatskim promjenama.

"Međutim, nama je vrijeme bilo skoro pa idealno, čim je sunce progrijalo bilo je sve lakše, jer ne zaboravimo da smo visoko iznad nivoa mora i da avioni lete na tim visinama", rekao je Junuzović.

Da se potpuno može biti zadovoljan i ako ne ispunite primarni cilj, a to je pristup na vrh planine pokazala je

Senada. Iskusna planinarka je zbog predostrožnosti morala prekinuti svoj put ka vrhu iako je najteži dio prešla.

“Teren je jako težak za penjanje, a još teži za silazak. U oba smjera potrošite oko 14 sati. Obuća mi se toliko oštetila da nismo bili sigurni da bi se mogla bezbjedno vratiti. Logična odluka bio je prekid daljeg uspona i povratak u bazu. To je za nas planinare najteža odluka, ali ipak prednost dajemo sigurnosti nad rizikom”, kazala je Senada.

Učesnici ekspedicije su naveli da je Damavand veoma potcijenjena planina i da zaslužuje mnogo više respekta u svim segmentima. Završni uspon kreće sa 4.200 m pa skoro do 5.600 m, što je strahovito naporno. Drugi segment je sumporno isparavanje zbog kojeg mnogi odustaju na oko 5.000 metara nadmorske visine.

Senad je na kraju naveo da je sreća što je cijeli tim bio sastavljen od iskusnih planinara, alpinista i GSS spasitelja. U povratku su imali i akciju pomoći i spašavanja povrijeđene planinarke iz Irana. Djevojka je bila dezorijentisana i suprug ju je doslovno vukao niz sipar samo da izgube na nadmorskoj visini što prije. Zbog nemogućnosti sporazumijevanja naše kolege nisu smjele nista poduzimati jer su sumnjali i na alergiju te gušenje koje su oni gestikulirali.

“Pozvali smo pomoć, a Petra i Aleksandar su je velikom brzinom spustili na pristupačniji i stabilniji teren te se tu zadržali do dolaska ljekara”, kazali su.

Posebno su istakli da je Iran prijateljska zemlja sa nevjerovatno ljubaznijim narodom, te predlažu svima da posjete ovu kolijevku civilizacije.(klix,tl)

Date: 24-08-2019